

Qu'ère dab lou payran, au cant dou Gabe, quon, p'ou prumè cop, entenouy à parla francés. Que-ns èrem asseduts ta decha bébe las baques. Sus dus calhaus, û parelh d'estranys que-s plasèn à espia lous gourgs blus e lous flocs blancs de l'aygue enhouliade. La madame que debisabe e que coumpreni aus oelhs de l'ayòu que nou seguibe lou prousey qu'à male-ayse.

...B'en abém hèytes d'outes mayes courrudes, e aprèses quonandes manières de-s ha carreya e de s'abala lou pays ! Be bi dens aquères ores, sus la lane d'Arrens, û escabot d'Anglés à las comes de guilhems-pesquès, passa coum l'eslambrec, acabalats sus l'enyibane de hèr, la qui abè grane arrode daban e petite darrè. Be debi béde autaplâ l'ateladye poumpous de Lanusse, lou guide aussalés, l'òmi goalhard en bèste rouye, culote courte e guètrous blancs, dab lous sous péus d'or hournits e loungs sus las espalles, debara d'Aygues-Bounes au trot mesurat dous quotate chibaus, touts d'û medich pelam.

...N'abouy yamey lou gay qui-m toucabe talèu que lou pay-boû e s'apressabe d'ue coumode de cerisè, û moble doun se goardabe toustém la clau dens lou fausset. Maynat, be l'èy espiade dab oelhs de langou ! Quon sentibi que-n anabe aubri la tiréte, que m'y hasi per endabans, amistous, e l'aygue à la bouque. Esmiraglat de toutes las causes qui s'arrecaptaben aqui deguens. L'esplinguè pignat de l'arrè may-boune, ue cousquilhe de mar, nou sèy quin biengude dinque aqui ; û petit arrebot en boys de bouch dab lou quouau l'ayòu e dabe lou lis aus esclops ; la boussète de lâ en tricot rouye e ribantade, oun lous mounècous de couyre e tringuereyaben au mièy de las pecètes e de quauques oelhs de hârri. A bèts cops, pas tout die, l'ayòu que-n tirabe dus ou très sos enta croumpa bouniqueries. Labéts qu'ère hèste-annau ! D'aulhous qu'ère dens la maysoû lou soul qui m'en balhèsse.